

Yusuf^(a.s) Kī Ġulaamī

Taurait : K̄hilqat 39:3-12, 16-23

Putifaar ne dekhā ki Allaah taa'alā Yusuf^(a.s) ke saath hai aur usko Allaah taa'alā kī wajah se har kaam me kaamyābī haasil hotī hai. ⁽³⁾ Islie Putifaar Yusuf^(a.s) se bahut k̄hush thā. Usne Yusuf^(a.s) ko apne saath kaam karne kā mauqā diyā aur apne ghar ko sambhaalne me unkī madad lī. Yusuf^(a.s) Putifaar kī har cheez ke maalik the. ⁽⁴⁾ Jab Yusuf^(a.s) ghar ke maalik ho gae to Allaah taa'alā ne ghar ko aur Putifaar kī har cheez ko barkat dī. Allaah taa'alā ne Putifaar ke khetoñ me paidā hone waalī har cheez ko bhī barkat dī. Allaah taa'alā ne ye sab Yusuf^(a.s) kī wajah se kiyā. ⁽⁵⁾ Putifaar ne Yusuf^(a.s) ko apne ghar ke har kaam kī zimmedaarī sauṃp dī. Usko kisī bhī cheez ke baare me sochnā naheen paḍtā thā sirf is baat ke ki usko kyā khaanā hai.

Yusuf^(a.s) ek bahut k̄hubsurat naujawaan the. ⁽⁶⁾ Kuch̄ dinoñ ke baad Yusuf^(a.s) ke maalik kī beewī un par kuch̄ k̄haas dhyaan dene lagī. Ek din usne unse kahā, “Mujhse pyaar karo,” ⁽⁷⁾ lekin Yusuf^(a.s) ne manā kar diyā aur kahā, “Merā maalik mujh par bharosā kartā hai aur ⁽⁸⁾ usne mujhe is ghar me baraabrī kā rutbā diyā hai. Main uskī beewī se pyaar naheen kar saktā. Ye gunaah hai, aur main Allaah taa'alā ko naaraaz naheen kar saktā.” ⁽⁹⁾ Wo aurat roz Yusuf^(a.s) se yahī k̄hwaahish kartī thī, lekin Yusuf^(a.s) manā kar dete the. ⁽¹⁰⁾

Ek din Yusuf^(a.s) apnā kaam karne ghar ke aṅdar gae aur us waqt pure ghar me sirf wahī akele ādmī the. ⁽¹¹⁾ Unke maalik kī beewī ne unkā kurtā pakaḍ liyā aur kahā, “Mere saath bistar par āo.” Lekin Yusuf^(a.s) itnī tezī se kamre se baahar bhaage ki unke kurte kā daaman uske haath me rah gayā. ⁽¹²⁾

Usne wo kurtā apne miyaañ ko dikhaayā aur kahā, “Jis Ibraanī ġulaam ko āp is ghar me laaye the usne mujh par hamlā karne kī koshish karī. ⁽¹⁶⁻¹⁷⁾ Lekin wo jaise hī mere paas āyā to main chillaaī jisse wo ḍar ke bhaagā aur uske kurte kā daaman mere haath me hī rah gayā.” ⁽¹⁸⁾ Yusuf^(a.s) ke maalik ne apnī beewī kī baat sunī aur wo bahut naaraaz huā. ⁽¹⁹⁾ Putifaar ne Yusuf^(a.s) ko us jel me ḍaal diyā jahañ baadshaah ke mujrimoñ ko rakhā jaatā thā. ⁽²⁰⁾

Allaah taa'alā Yusuf^(a.s) ke saath thā aur un par raham kartā rahā jiskī wajah se jel kā sardaar bhī Yusuf^(a.s) ko pasāñd karne lagā. ⁽²¹⁾ Usne Yusuf^(a.s) ko kaidiyōñ ke kaam-kaaj kā zimmedaar banā diyā. ⁽²²⁾ Jel ke paharedaaroñ kā sardaar Yusuf^(a.s) kī har baat par bahut bharosā kartā thā. Ye sab islie huā kyunki Allaah taa'alā ne Yusuf^(a.s) kī madad karī taaki wo har kaam me kaamyāb ho. ⁽²³⁾